

REGIONAL NEWS

HEADLINES:-

1. Governor Dr Hari Babu Kambhampati an Fisheries Department hmalakna leh central Scheme leh Bank kaltlanga Sangha Vulhtute tanpui dan tur Fisheries Dept hotute a sawipui.
2. Mizoram-Assam ramri chungchanga state 2 inbiakna chu naktuk khian Aizawl Chaltlang State Guest House ah neih a ni ang.
3. Jal Jeevan Mission hnuaiiah thingtlang chenna in zaa 77 ah tui herh haw theiha siam tawh a ni.
4. India leh New Zealand-te chuan ram pahnih inkara sumdawonna hmasawn nan custom lama thawhdunna tur inremna an ziak.

<><><>

GOVERNOR

Governor Dr Hari Babu Kambhampati an Fisheries Department hmalakna leh central Scheme leh Bank kaltlanga Sangha Vulhtute tanpui dan tur vawiin khan Raj Bhavan-ah Fisheries Dept hotute a sawipui a.

Kum 2023 March 28 a Fisheries Department nena meeting an lo neih tawh atanga tun thlenga an hmalakna te an sawiho a, Governor chuan Sangha Vulh bikah hian state-in intodelh theihna a nei sang hle a, hetihlai hian State sum dinhmunin a zir loh avangin Fisheries Department in Budget a nei lian thei lo a ni a ti a, Central sponsored scheme tam tak, Sangha Vulhtute dawmkanna leh tihhmasawna tur erawh a awm teuh tih sawiin Mizoramin Sangha thar chhuah tihpun, eikhawp tharchhuah leh hralh chhuak thei tur khawpa tam thar thei tur chuan Fisheries Department in nasa takin tan a lak a, project tam zawk Central Sawrkarah a thehluh zung zung a ngai a ni a ti.

Central Scheme hnuaiia Subsidy Sangha Vulhtuten a dawn te belhchhah turin Sangha Vulhtuten Bank Loan an mamawh belh thin tih sawiin Sangha vulhtute zingah loan la duh lo an awm thin chu zirchian a tul a ti a. Bank loan chungchang te leh a rulh dan kalphung te chianguang taka an hriatloh vang te thil ni thei a nih avangin hemi chungchangah hian Fisheries Department leh Bank lam te pawh thawkhoin tan an lak a tul tih a sawi bawk a ni.

Fisheries Department aiawhin Pu H.Lalengmawia, Secretary chuan tunhnaia Fisheries Department hmalakna te, hlawhtlinna te, Ministry-a rawtna thehluh zat te, hmalak dan tur leh ruahmanna en neih mekte a sawi a, Director Pi Laltleipuii leh a thawhpui officer-te'n an an hnathawh hrang hrang an sawifiah bawk.

Tunah hian Fisheries Department chua Mizoram chhunga Hectare 24000 chu Sangha dil siam theihna niin an chhuta, heng zingah hian Hectare 4000 chuang velah Sangha Vulhtuten hma an la mek a ni. Ram pum huap anga chhutin mi pakhatin Kum khat chhungin sangha Kg 11

atanga Kg 13 inkar vel a ei tlang pui a. Mizoramah chuan kum khat chhungin mi pakhat tan zel Kg 6.4 chauh a la thar chhuak thei a, a tam zawk chu pawn lam atanga lakluh a la ni mek a ni.

He meeting-ah hian Mizoram Rural Bank, State Bank of India, Mizoram, leh Mizoram Cooperative Apex Bank hotute pawh Sangha vulhtute nena bank inthlunzawm leh thawhho a pawimawhzia sawipui tura sawm an nih angin an tel a, Hemi chungchangah hian, Fisheries Department Secretary chairman-na hnuaiah Banker te leh Fisheries Department te meeting neih thin rawt a ni.

<><><>

CM

Chief Minister Pu Lalduhoma hovin CM Conference Hall ah Mizoram Externally Aided Projects a kalpui mek leh kalpui tur hmachhawp te sawiho a ni a.

Meeting hian project kal mek bawhzui zel dan tur te, Department of Economic Affairs in loan puk theih zat a bituk chhunga insiamrem dan tur te, project theluh tura duan Council of Ministers in a ngaihtuah hmaabak la awm te an thlirho a ni.

Meetingah hian Minister Pu Lalthansanga, Pi Lalrinpui Pu F. Rodinglana leh Pu Lalnghinglova Hmar bakah Pu TBC Lalvenchhunga, Adviser to CM bakah Dr. Renu Sharma, Chief Secretary te leh Project kaihnawih official pawimawh te an tel a ni.

Vawiin vek khan CM Conference Hall-ah Chief Minister Pu Lalduhoma hovin sawrkar mi pawimawhten hmasawna project kal mek leh hmachhawp thenkhatte kalpui dan an sawiho bawka a.

Meeting ah hian Bairabi to West Phaileng inkara 132 K/v SC line hnathawh forest clearance bawhzui dan tur te, Pukzing leh Silsury inkar kawngpui zauhna tur forest clearance hmalak tawh chin te, Tualpui leh Champhai inkar kawngpui siam tura forest clearance atana hma lak tawh chin te an sawi a. Heng project-a thil pawimawh dang te pawh an sawi bawka.

<><><>

AMC MAYOR

Aizawl Municipal Corporation Mayor Pu Lalrinenga Sailo chuan Bawngkawn atanga Durtlang inkar khawih theih loha hung bik protected Area ah dan bawhchhiatna a awm loh nan hma an la tih a sawi a,

Mayor chuan AMC chuan protected area huam chhungah insak phalna tumah an la pek loh thu sawiin, dan kalha insak leh hmalak awm mekte ti tawp turin chak takin hmalak mek a nih thu a sawi a.

Helai hmuna lei laih leh insak chungchangah High Court in PIL Suo Moto order a rawn chhuah chungchangah AMC chuan fel taka an chhan thu Mayor hian a sawi a, High Court thutlukna a zirin, hmalak chhonzawm pawh an tum tih a sawi.

<><><>

BORDER TALKS

Mizoram-Assam ramri chungchanga state 2 inbiakna chu naktuk khian Aizawl Chaltlang State Guest House ah neih a ni dawn a, Tlai dar 4 ah inbiakna neih a ni anga, Home Dept atanga thudawn danin Ministerial level inbiakna ah hian Mizoram lam chu Home Minister Pu K Sapdangan a ho anga, Assam lam hi Border Protection and Development minister Atul Bora-an a ho thung ang.

Assam palai te hi naktuk chawhnu ah Mizoram an lo thlen beisei a ni a, an inbiak zawh hnu tlai dar 6 ah chinchinthar thehdarhtute an kawm zui ang.

Chief Minister Pu Lalduhoma kaihhruai ZPM sorkar a din hnu a ramri chungchanga Mizoram leh Assam palaite inbiak tum 1-na tur a ni.

<><><>

DRAGON FRUIT

Dragon Fruit chingtute leh a siamchhuah kawnga thalai hetiang a lama tuite puala buatsaih Dragon Fruit Extravaganza chu vawiin khan Horticulture Minister Prof Lalnilawma'n Aizawl Millennium Centre kawt ah a hawng.

Dragon Fruits Extravaganza hawna ah hian Horticulture Minister Prof Lalnilawma chuan tualchhunga kut hnathawk tuten an tharchhuah te awmze nei zawka siamchhuah emaw hralhchhuah dap atul thu sawiin, Dragon Fruit bakah Sapthei thar tam thei te pawh kumthar lamah sorkar in hmalak a tum thu a sawi.

Prof Lalnilawma chuan Mizoram ah Dragon Fruit hun reilote chhunga hmasawna thar hmuh ani chu lawmawm a tih thu sawiin, Dragon Fruit chingtute chu ramchhung bakah ram pawn thlenga an tharchhuah te thawn chhuak thei tur khawpa hmala turin a fuih a ni.

Tun dinhmunah Mizoramah Dragon Fruit chingtu mi 563 bawr vel awm mekin, Dragon Fruit quintal 4000 Chuang an tharchhuak a ni.

Greenwave Farmtech, Horticulture Dept leh Mizoram Dragon Fruit Farmer Association te tangho buatsaih Dragon Fruit Extravaganza hian inrinni thleng a aw h ang.

<><><>

MAMIT JT VC

Women and Child Development, Mamit District hnuai District Hub For Empowerment of Women, buatsaihin Mamit Joint Village Council Memberte chuan hleilenna tuar leh hmeichhe baihvaitte tlukluhna-In, One Stop Centre leh Shakti Sadan an tlawh a.

One stop centre leh Shakti Sadan tlawhna hun hi khawtlang hruaitute'n Chiang zawka an lo hriat theihna tur atana buatsaih a nih mai bakah khawtlang hruaitu te nena thawhhona tha zawk neih zel a nih theihna tur atana buatsaih a ni.

District Hub for empowerment of woman te hian June thla atanga October thla thlengin 100 Days Special Awareness Campaign an kalpui a, chumi hmalakna kalzelah chuan Jt. VC te nen hian hun hman ho a ni.

<><><>

JAL JEEVAN MISSION

Jal Jeevan Mission hnuaiiah thingtlang chenna in zaa 77 ah tui herh haw theiha siam tawh a ni. Union Jal Shakti Minister C R Patil chuan vawiin khan Lok Sabha-a zawhna chhangin Narendra Modia sawrkar chuan Jal Jeevan Mission scheme hi kum 2019 khan a tan a, chenna in vaibelchhe 15 chuangin tui an herhhaw thei tawh a ti a. Zirchiannaa tarlan anih danin tui thianghlim herh haw theiha siam anih avang hian natna hrik umbo nana hman tur cheng vaibelchhe nuai 8 chuang hum a ni a ti.

<><><>

RAJYA SABHA

Vawiin Rajya Sabha rorel inkhawmah Paris Olympic-a Indian hmeichhe wrestler Vinesh Phogat disqualify anih chungchangah Opposition memberte lungawiloin house atangin an chhuak tau. House rorel tan anih hian Opposition leader Mallikarjun Kharge chuan Vinesh Phogat disqualify anih chungchang sawiho a phut chu khap a ni a. Hemi hnu hian Congress, TMC, DMK,RJD leh member dangte chu lungawiloin house atangin an chhuak a ni.

Hetihlai hian Chairman Jagdeep Dhankar chuan oppositioni te chet dan chu demin rampumin Vinesh Phogat disqualify a ni chu pawh an ti vek tih a sawi a. Union Minister leh House leader JP Nadda pawhin opposition te chet dan a dem thu a sawi bawk a ni.

<><><>

PRESIDENT IN NEW ZEALAND

India leh New Zealand-te chuan ram pahnih inkara sumdawna hmasawn nan custom lama thawhdunna tur inremna an ziak. New Zealand tlawha cham mek President Draupadi Murmu-i chuan vawiin khan New Zealand Prime Minister Chrsitopher Luxon leh Deputy Prime Minister leh Foreign Affairs minister ni bawk Winston Peters te Wellington-a Government House ah a kawm a. He hunah hian thawhdunna tur hrang hrang custom lamahte, tualchher damdawi siamchhuahna leh energy thianghlim chungchangte an sawiho a. President-in New Zealand ram hruaitute a kawmna hian rah tha tak a chhuah dawn niin kan correspondent chuan a sawi a ni..

<><><>

PROTEST OVER PRICE RISE

Vawiin khan Parliament tualah purun leh alu man sang zel duh loin Oppostion party ten lungawilohna an lantir. Opposition MP te chuan loneitute tan dan hnuaiiah MSP tha tak pek an phut a. Shiv Sena (UBT) MP Priyanka Chaturvedi, Trinamool Congress MP Derek O Brien, RJD MP Manoj Kumar Jha, Congress MP Promod Tiwari leh NCP (Sharad Pawar) MP Supriya Sule te pawh he hunah hian an tel a ni.

<><><>